



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
Tribunál Distritál Dili
24 Jullu 2015

Tribunál kondena pena prizaun tinan 12 ba kazu violasaun seksuál

Iha 20 Jullu 2015, Tribunál Distritál Dili prezide leitura akordaun no kondena arguidu MT ho pena prizaun tinan 12 tanba provadu komete krime violasaun seksuál hasoru MC, iha Distritu Dili.

Tribunál prova katak iha 10 Fevereiru 2015 iha tuku 12:45, arguidu obriga tula lezada ba Kristo Rei no wainhira to'o fatin akontesimentu arguidu obriga hasai lezada nia roupa hodi halo relasaun seksuál ho lezada.

Ministériu Públiku akuza arguidu kontra artigu 172 Kódigu Penál kona-ba violasaun seksuál ho moldura penál tinan 5 to'o 15.

Iha julgamentu arguidu nega faktus hotu hosi akuzasaun Ministériu Públiku nian. Mezmu arguidu nega faktus maibé tribunál bazeia ba depoimentu lezada, testemuña, deklarasaun arguidu nian iha primeiru intregatoriu no relatóriu mediku hosi Pradet, tribunál prova katak arguidu ho intensaun no obriga halo duni relasaun seksuál ho lezada.

Depois rona tiha leitura akordaun, defeza promete sei halo rekursu hasoru desizaun tribunál iha prazu loron 15 nia laran.

“Ami hanoin katak desizaun ne'e apropiadu tanbá refléta gravidade hosi aktu ne'ebé arguidu komete hasoru lezada no desizaun ne'e mós serve hanesan meiu ida atu eduka arguidu no sociedade atu hadook-an hosi krime violasaun seksuál hasoru fetu ne'ebé buras ba bebeik iha ita nia sociedade,” dehan Luis de Oliveira Sampaio, Diretór Ezekutivu JSMP.

JSMP observa katak iha mudansa boot iha nível qualidade desizaun sira iha kazu violénsia hasoru fetu tanba kondena arguidu sira ho pena todan. Ne'e pasu ida importante atu haruka mensajem ba publik katak estadu liu hosi nia instituisaun competente sira iha kbiit atu proteze sidadaun sira no asegura justisa ba sira ne'ebé sai vítima.

Mesmu nune'e, JSMP hanoin katak importante atu konsidera hodi kondena arguidu sira selu indemnizasaun ba lezada. Ne'e praktika di'ak atu rekoñese lezada nia sofrémentu nu'udar konsekuensia hosi arguidu nia hahalok.

JSMP hanoin katak kuandu selu indemnizasaun iha Timor-Leste normalmente tenke sempre involve membru família atu kontribui osan hodi realiza ida ne'e. Ba JSMP ida ne'e importante katak membru família sira seluk simu responsabilidade hosi aktu ne'ebé arguidu komete no ida ne'e bele sai lisaun sosial ba ema seluk atu aprende hosi prosesu ne'e. Signifika katak se sira komete krime hanesan sira nia família sei simu mós responsabilidade atu selu indemnizasaun ba vítima.

Kazu ne'e rejista iha tribunál ho Núc. 0016/15.DIBCR. Julgamentu ba leitura akordaun prezide hosi representante juis kolektivu Dra. Jacinta Correia da Costa, Ministériu Públiku representa hosi Dr. Reinato Bere Nahak no arguidu hetan akompañamentu hosi Dr. Marcelino Marques Colo (defensória públiku estajiáriu).

Atu hetan informasaun liutan favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org